

Aramaioko Udaletxean, P. I. Barrutiaren hirugarren mendeurrena ospatuz, bildu da Euskaltzaindia, 1982.eko Abenduaren hemezortzian, arratsaldeko lau t'erdietan. Etorri dira: L. Villasante euskaltzainburua, A. Irigoyen, E. Knörr, P. Lafitte, E. Larre, J. San Martín eta J. M. Satrustegi euskaltzainak. J. A. Arana, J. M. Lekuona, J. L. Lizundia, P. Martín Latorre, P. Uribarren eta J. J. Zearreta, euskaltzain urgazleak, J. M. Satrustegi idazkari dela.

J. Haritschelhar eta P. Altunak ezin etorria adierazi dute.

Emilio Guevara, Arabako Diputatu Nagusia, eta Jexus Zabala Aramaioko Alkatea, eseri dira mahai buruan, L. Villasante eta E. Knörr euskaltzainekin batera.

Herriko Alkateak eman die batzartuei ongietorria.

Goizeko bilkuraren berri

Euskaltzainek goizean erabilitako gai hauek aipatu ditu idazkariak: datorren Urtarrilaren zazpian eta zortzian, maileguzko hitzei buruzko jardunaldiak egingo dira Uztaritzen.

Otsaileko batzarra, Nafarroan egingo da, Blas Alegria zenaren mendeurrena Lakuntzan ospatuz. Eta 1983.eko egutegiarekin jarraituz, Joannes Elizalde “Zerbitzari” idazlearen ehun-urteburua, Azkainen, bazko astean edo egitea aipatu da. Markinan, Dialektologiako jardunaldien jarraipena egin daiteke Irailean, “Parlanzu edo Piestak” izeneko gertakariaren mendeurrena gogoan dela.

Denbora berean, Tolosako “Lizardi Kultur Elkartek” olerkari honen omenez martxorako gertatu nahi duen kultur astean partaide izango da Euskaltzaindia, bere batzarre berezirik egingo ez badu ere.

Eskuarteko beste zenbait gutun, eskari eta albiste ikusi dira.

Barrutiaren omenaldia

Lau hitzaldirekin ospatu da P. I. Barrutiaren mendeurrena.

Euskaltzaindia bigarren aldiz datorrela Araban euskara hobekienik gorde duen Aramaiora, gogoratu du L. Villasantek bere agurrean. Xuberoko pastoralez beste

alde, Barrutiaren “Gabonetako ikuskizuna” euskarazko teatro zaharrena da. Euskaltzaindia euskalkien aurka dagoela esaten dutenei eskuarteant ditugun Dialektologiako azterketak eta gaurko hau bezalako ospakizunak, lekuko mintzairen maitemenez eginak direla esan die.

J. M. Velez Mendizabal mintzatu da gero Aramaioko antzerkilariaren bitzitza gaitzat harturik. Haren jatorria, aita-amen berriak eta hamazazpigarren mendeko herri giroa adierazi ditu zehaztasun ugariarekin.

J. M. Lekuonak Barrutiaren lana aztertu du bere txostenean, zer baliotako idazkia den azalduz. Besteak beste, lekukotasun estimagarria eskaintzen dio Euskal Herriko antzerkigintzari.

Oraintxe atera berri da Arabako Foru Diputazioak egin duen “Gabonetako Ikuskizuna. Edizio, itzulpena eta oharrak”, izenburuko argitalpena. E. Knörr jauna horretaz mintzatu da lanaren helburu eta mugak azpimarratuz. Joseba Andoni Laka-rrak egin du traskribapena.

E. Guevara, Arabako Diputatu Nagusia mintzatu da amaieran, Arabako Foru Aldundia, Euskaltzaindiaren sortzailetakoa dela aitortuz; eta karguetan gizonak aldatu arren, Arabak ez diola bere erantzunkizunari alor honetan inoiz uko eginen, esanez.

Besterik gabe bukatu da batzarra.

Arratsaldeko seietatik aurrera, Oartzungo INTXISU taldeak, Barrutiaren “Gabonetako Ikuskizuna” antzeztu du.

Euskaltzainburua

Fr. Luis Villasante

Idazkaria

Jose M.^a Satrustegi